

Selasa, 3 Mac 2015

1. Bayar cukai pendapatan guna kad kredit

CYBERJAYA 2 Mac - Bayaran cukai pendapatan kini boleh dibuat menggunakan kad kredit dan debit Visa, MasterCard dan American Express yang dikeluarkan oleh institusi perbankan di negara ini.

Timbalan Menteri Kewangan, Datuk Ahmad Maslan berkata, pembayaran itu boleh dilakukan menerusi portal yang disediakan oleh Lembaga Hasil Dalam Negeri (LHDN) iaitu <https://byrhasil.hasil.gov.my/>.

Ujarnya, perkhidmatan baharu tersebut merupakan inisiatif terkini LHDN dengan kerjasama Kumpulan Maybank bagi memastikan urusan pembayaran cukai lebih mudah dan pantas.

"Cara itu juga dapat mewujudkan masyarakat 'tanpa tunai' iaitu segala urusan pembayaran dilakukan secara dalam talian sekali gus dapat memberi lebih keselesaan kepada pembayar cukai yang sebelum ini dilakukan secara manual di kaunter dan mesin deposit tunai."

"Melalui kaedah itu, LHDN menjangkakan bilangan transaksi pembayaran cukai secara dalam talian pada tahun ini akan meningkat kepada 25 peratus daripada 13.1 peratus seperti yang direkodkan pada tahun lalu," katanya.

Beliau berkata demikian dalam sidang akhbar selepas melancarkan inisiatif terbaru tersebut bersempena Majlis Sambutan Hari Hasil ke-19 di Menara Hasil di sini hari ini.

Yang turut hadir, Ketua Pegawai Eksekutif LHDN, Tan Sri Dr. Mohd. Shukor Mahfar.

Dalam majlis itu, Ahmad turut melancarkan kempen 'Saya Cinta Malaysia' bagi memupuk kesedaran orang ramai mengenai kepentingan membayar cukai dengan menjadikan selebriti terkenal tanah air, Datuk Aznil Nawawi sebagai ikon program tersebut.

Sementara itu, Ahmad berkata, kerajaan melalui LHDN menyasarkan kutipan cukai pada tahun ini sebanyak RM142.65 bilion meskipun situasi ekonomi negara kini tidak menentu.

Sehubungan itu, beliau meminta LHDN membuat perancangan dan strategi luar biasa supaya sasaran kutipan cukai pada tahun ini mampu dicapai.

Dalam pada itu, beliau berkata, cukai barang dan perkhidmatan (GST) yang akan mula dilaksanakan pada 1 April ini dijangka mengurangkan kutipan cukai pendapatan sebanyak RM6.12 bilion selain kejatuhan harga minyak yang turut mempengaruhi unjuran kutipan cukai tersebut.

"Bagaimanapun berdasarkan kepakaran yang terdapat pada LDHN, saya yakin cabaran ini dapat ditangani dengan sebaik-baiknya," katanya.

Selasa, 3 Mac 2015

2. Pengambilan wanita untuk jawatan tinggi meningkat

KUALA LUMPUR 3 Mac - Pengambilan pekerja wanita untuk jawatan tertinggi dalam bidang pengurusan di negara ini meningkat sebanyak 34 peratus tahun ini berbanding 29 peratus sepanjang 2014 iaitu yang kedua tertinggi di antara lima negara membabitkan Malaysia, Singapura, Hong Kong, China dan Jepun.

Pengarah Urusan Hays Asia, Christine Wright berkata, Laporan Panduan Penggajian 2015 Hays mendapati, peningkatan tersebut meletakkan Malaysia lebih baik dalam mengiktiraf keseimbangan gender di sektor pekerjaan mengatasi Hong Kong sebanyak 31 peratus manakala Singapura di kedudukan keempat atau 29 peratus disusuli Jepun 19 peratus.

Wright berkata, hasil kaji selidik firma antarabangsa itu yang terbabit dalam pengambilan pekerja mendapati, Malaysia menunjukkan peningkatan memberangsangkan dalam kepelbagaian gender untuk jawatan pengurusan, walau bagaimanapun perubahan dalam polisi sesuatu organisasi masih perlu untuk menyerlahkan lagi peranan golongan wanita.

"Malaysia telah mengambil langkah ke hadapan yang baik untuk mempelbagaikan jantina di tempat kerja.

"Sekiranya pihak yang mempunyai kuasa dapat melaksanakannya, akan meletakkan perubahan besar di peringkat kepimpinan kepada generasi akan datang dan mengurangkan jurang antara pemimpin lelaki dan wanita," katanya dalam satu kenyataan menerusi laman web firma berkenaan di sini hari ini.

Wright berkata, kaji selidik yang dibuat ke atas 2,361 majikan yang menggaji lebih empat juta pekerja di kelima-lima negara turut mendapati kadar kenaikan gaji di Malaysia adalah antara enam hingga 10 peratus setahun iaitu yang kedua selepas China yang mencatat kenaikan gaji antara 10 hingga 16 peratus.

Sementara itu katanya, dalam kalangan negara Asia, majikan di Malaysia dilabelkan sebagai paling murah hati apabila kadar kenaikan gaji yang tinggi turut disertakan dengan pelbagai faedah pekerjaan lain termasuk pemberian bonus kepada pekerja berdasarkan prestasi kerja masing-masing.

Selasa, 3 Mac 2015

3. Kakitangan awam 'ponteng' cabut lari

SHAH ALAM 2 Mac - Beberapa kakitangan awam yang sedang menikmati sarapan pagi di sebuah restoran di sini bertempiaran lari mengikut pintu belakang sebaik sahaja melihat kenderaan Setiausaha Kerajaan Negeri (SUK), Datuk Mohamed Khusrin Munawi menghampiri premis berkenaan.

Itu antara gelagat yang dapat dilihat ketika Mohamed Khusrin mengadakan pemeriksaan mengejut ke atas premis makanan bagi 'menangkap' kakitangan awam yang makan dan minum bukan pada waktu rehat ditetapkan.

Menurut beliau, sejak pemantauan dilakukannya pada bulan lalu, kira-kira 100 kakitangan awam dikesan melanggar peraturan.

"Hari ini merupakan kali kedua kita menjalankan pemantauan sebegini bertujuan mendidik penjawat awam mengenai kesalahan yang mereka telah lakukan."

"Hari ini kita dapat kesan 30 kakitangan awam dan saya percaya ada ramai lagi yang berjaya meloloskan diri apabila melihat kereta saya," katanya ketika dihubungi Utusan Malaysia di sini hari ini.

Beliau menambah, setiap kakitangan awam yang ditahan akan diambil butir peribadi supaya laporan dapat dihantar kepada ketua jabatan masing-masing untuk tindakan lanjut.

"Kakitangan terbabit akan diberi kaunseling supaya mereka tahu tanggungjawab dan peraturan ditetapkan," ujarnya.

Sementara itu, Mohamed Khusrin dalam akaun Twitter miliknya memberitahu, beliau melakukan pemeriksaan mengejut ke restoran-restoran di sekitar bandar raya ini yang sering menjadi tumpuan kakitangan awam untuk bersarapan pada waktu pejabat.

Jelasnya, biarpun perkara tersebut telah menjadi viral dan mendapat perhatian orang ramai, masih ada segelintir kakitangan awam sama ada daripada agensi Persekutuan, negeri dan pihak berkuasa tempatan (PBT) yang masih lagi menganggap budaya minum pagi sebagai satu kemestian.

"Pemantauan akan terus dilaksanakan supaya budaya ini dapat kita kikis sepenuhnya demi memartabatkan kembali perkhidmatan awam," katanya.

Rabu, 4 Mac 2015

4. Melaka catat jumlah hutang RM861.7juta

MELAKA 3 Mac - Kerajaan negeri mencatat jumlah hutang sebanyak RM861.7 juta kepada kerajaan Pusat pada akhir tahun lalu.

Ketua Menteri, Datuk Seri Idris Haron berkata, jumlah tersebut merupakan baki pinjaman pokok yang dibuat oleh kerajaan negeri kepada kerajaan Pusat tahun lalu.

"Jumlah keseluruhan pinjaman bagi agensi negeri kepada institusi kewangan pula adalah RM225.73 juta dan baki pada 31 Januari lalu adalah sebanyak RM192.06 juta.

"Jumlah pinjaman tersebut hanya tertakluk kepada lima agensi iaitu Yayasan Melaka, Majlis Agama Islam Melaka (MAIM), Kolej Universiti Islam Melaka (KUIM), Perbadanan Kemajuan Negeri Melaka dan Melaka ICT Holdings Sdn. Bhd.," katanya.

Beliau berkata demikian ketika menjawab soalan Khoo Poay Tiong (DAP-Ayer Keroh) dalam Sidang Pertama Penggal Ketiga Dewan Undangan Negeri (DUN) Ke-13 di Seri Negeri, Ayer Keroh, di sini hari ini.

Dalam pada itu, Idris berkata, rizab kerajaan negeri terbahagi kepada tiga iaitu rizab akaun mengurus, rizab di bawah Tabung Amanah Melaka dan pinjaman kepada agensi.

Katanya, kerajaan mencatat nilai rizab sebanyak RM206.61 juta pada tahun lalu manakala pada 2013 adalah RM217.13 juta.

Sementara itu, kata Idris, pada tahun ini kerajaan negeri mencatatkan jumlah penerima Bantuan Rakyat 1Malaysia (BR1M) terendah di negara ini iaitu seramai 5,369 orang dengan peruntukan sebanyak RM4.56 juta.

Katanya, Melaka Tengah mencatatkan penerima teramai iaitu sebanyak 3,036 orang diikuti Alor Gajah (1,427 orang) dan Jasin (906 orang).

"Pemberian BR1M ini merupakan usaha kerajaan merasionalisasikan pemberian subsidi dan ianya diberikan kepada mereka yang benar-benar layak," katanya

Rabu, 4 Mac 2015

5. 14 penguat kuasa empat agensi ditahan SPRM Anggota kastam dan KPDNKK turut terima suapan

KUALA LUMPUR 4 Mac - Suruhanjaya Pencegahan Rasuah Malaysia (SPRM) membuktikan mereka bukan menasarkan satu agensi penguat kuasa sahaja dalam melaksanakan Op Licin 2.

Ini dibuktikan dengan penahanan 14 individu lagi termasuk anggota Kementerian Perdagangan Dalam Negeri, Koperasi dan Kepenggunaan (KPDNKK) dan Jabatan Kastam Diraja Malaysia (JKDM) kerana dipercayai bersubahat dalam kes penyeludupan dan penjualan petrol ke negara jiran.

Mereka yang ditahan terdiri daripada lima anggota KPDNKK, tiga pegawai JKDM dan dua Pasukan Gerakan Am (PGA) serta seorang anggota tugas am Polis Diraja Malaysia (PDRM).

Turut ditahan dua pesara tentera dan seorang bekas pegawai KPDNKK dalam Op Licin 2 di Kedah dan Perak.

Kesemua individu berusia dalam lingkungan 30-an sehingga 50-an itu ditahan di pejabat KPDNKK Anak Bukit dan Kubang Pasu di Jitra, Kedah sebelum dibawa ke pejabat SPRM negeri kira-kira pukul 9.30 pagi sehingga 7 malam.

Utusan Malaysia difahamkan, kesemua mereka yang masih dan pernah bertugas di Kompleks Imigresen, Kastam, Kuaranin dan Keselamatan (ICQS) Bukit Kayu Hitam serta Kota Putra, Durian Burung terlibat dengan kegiatan penyeludupan berkenaan sejak beberapa tahun lalu.

Menurut sumber, mereka juga didapati tidak melakukan prosedur standard operasi (SOP) agensi masing-masing sehingga menyebabkan urusan jual beli petrol 'diper mudahkan' oleh sindiket. Katanya, terdapat pelbagai cara dikesan penguat kuasa tersebut bagi mendapatkan habuan masing-masing.

"Ada daripada mereka menerima wang secara tunai dan ada juga yang menerima wang suapan secara bulanan. Op Licin 2 yang dijalankan oleh SPRM ini akan dibuat secara berterusan sehingga kegiatan berkenaan dibantersa habis-habisan," katanya di sini.

Ujarnya, ketiga-ketiga pesara yang ditahan disiasat di bawah Seksyen 16(a)(B) Akta SPRM 2009 manakala pegawai penguat kuasa pula disiasat di bawah Seksyen 17(a) Akta SPRM 2009.

Semalam, seramai 11 orang ditahan agensi itu, sembilan daripadanya merupakan anggota polis dan dua adalah anggota Pasukan Gerakan Am (PGA).

Serbuan yang dijalankan sejak Isnin lalu, menjadikan seramai 36 orang telah ditahan termasuk anggota penguat kuasa Unit Pencegah Penyeludupan (UPP).

Khamis, 5 Mac 2015

6. IMDB perlu buat keputusan pantas - Khairy

KUALA LUMPUR 4 Mac - 1Malaysia Development Berhad (1MDB) perlu menjana semula kewangannya dengan pantas menerusi aset sedia ada bagi membolehkan syarikat tersebut membayar beberapa hutang tertunggak.

Menteri Belia dan Sukan, Khairy Jamaluddin berkata, sebagai sebuah syarikat besar, 1MDB perlu mengurangkan hutang-hutangnya.

"Mereka (1MDB) mempunyai beberapa aset termasuk kuasa yang tertakluk dalam tawaran awam permulaan (IPO) yang dirancang dalam tahun ini.

"Apabila IPO tersebut berjaya dan 1MDB mempunyai aliran wang, maka hutang yang tertunggak dapat dibayar," katanya kepada pemberita di New York sempena lawatan kerjanya ke Amerika Syarikat hari ini.

Khairy berkata, 1MDB juga perlu melakukan usaha menjana kewangan dengan lebih cepat termasuk meluluskan tanah untuk projek Tun Razak Exchange (TRX) dan Bandar Malaysia di Sungai Besi supaya aliran kewangan daripada aset tersebut dapat digunakan untuk menjelaskan hutang.

"Saya tidak bimbang jika kesemua aset atau liabiliti tersebut akan menjadi lubang hitam kepada 1MDB, tetapi pihak pengurusan perlu melakukan sesuatu dalam bentuk perniagaan untuk menjana wang dengan cepat.

"1MDB memerlukan aliran tunai yang kukuh untuk membayar faedah pinjaman yang dilakukan, sekali gus membolehkan syarikat tersebut membayar dan melaksanakan projek-projek mereka dengan segera," ujarnya.

Bagaimanapun, Khairy menegaskan bahawa aset 1MDB masih mencukupi dan boleh menampung liabiliti yang ditanggung syarikat tersebut.

Sementara itu, beliau menafikan dakwaan sebuah portal berhubung penyaluran dana berbilion ringgit oleh 1MDB kepada PetroSaudi.

"Dakwaan itu tidak benar dan isu tersebut sudah diaudit oleh sebuah firma perakaunan terbesar dunia iaitu Deloitte.

"Akaun yang sudah diaudit itu merupakan bukti kukuh untuk menafikan dakwaan tersebut," jelasnya.

Khamis, 5 Mac 2015

7. Sahkan akaun 1MDB - PM arahkan Ketua Audit Negara,-Laporan akan diserahkan kepada PAC

KUALA LUMPUR 4 Mac - Perdana Menteri, Datuk Seri Najib Tun Razak telah mengarahkan Ketua Audit Negara untuk mengesahkan secara bebas akaun 1Malaysia Development Bhd (1MDB).

Menurut kenyataan Pejabat Perdana Menteri hari ini, laporan Ketua Audit Negara akan diserahkan untuk pemeriksaan telus kepada Jawatankuasa Kira-kira Awam (PAC) yang bersifat bipartisan sepenuhnya dan mencerminkan komposisi Parlimen.

Ia menyatakan Perdana Menteri telah memberitahu Kabinet mengenai langkah itu.

"Jika terbukti ada salah laku, undang-undang akan dikuatkuasakan tanpa pengecualian," kata Najib.

Kenyataan itu menerangkan perdana menteri hari ini memanggil 1MDB dan juruaudit mereka, Deloitte menghadap Kabinet berikutan laporan media baru-baru ini berkaitan syarikat pembangunan strategik milik penuh kerajaan itu.

Setelah menerima penjelasan dari 1MDB dan Deloitte, Kabinet melahirkan keyakinan bahawa tidak terdapat sebarang salah laku dalam 1MDB, dan hasrat mereka supaya syarikat itu dibenarkan melaksanakan hasil semakan strategiknya yang dicadangkan," kata kenyataan itu.

Walaupun demikian, ia mengambil perhatian bahawa kerajaan telah meminta Ketua Audit Negara memeriksa akaun 1MDB sebagai langkah lanjutan.

Ia berkata, 1MDB telah memberi taklimat mengenai situasi semasanya dan menjawab siri pertanyaan dikemukakan oleh menteri-menteri kabinet, termasuk Perdana Menteri dan Timbalan Perdana Menteri Tan Sri Muhyiddin Yassin.

Deloitte katanya, memberi keterangan menyeluruh tentang urusan mereka dengan 1MDB dan mengesahkan bahawa firma itu telah mengaudit dan mengesahkan akaun syarikat berkenaan.

"Kabinet diberitahu bahawa dakwaan baru-baru ini yang ditujukan kepada 1MDB, adalah berkaitan transaksi pihak ketiga seperti Petrosaudi, bukan 1MDB.

"Pelaburan relevan 1MDB telah dikembalikan sepenuhnya dengan keuntungan signifikan yang tersedia diaudit," menurut kenyataan itu.

Sementara itu, Presiden dan Pengarah Eksekutif Kumpulan 1Malaysia Development Berhad (1MDB), Arul Kanda berkata, adalah jelas semua serangan yang ditujukan kepada 1MDB hanya bermotif politik dan sengaja dibuat sebagai percubaan untuk melemahkan syarikat dengan menyebarkan

dakwaan tidak berasas dan lebih bersifat spekulasi yang seterusnya akan memberi kesan kepada ekonomi.

"Sehubungan itu, 1MDB amat mengalu-alukan permintaan Perdana Menteri, Datuk Seri Najib Tun Razak supaya Ketua Audit Negara mengesahkan akaun 1MDB, yang mana sebelum ini telah diaudit oleh Deloitte yang juga satu daripada firma terkemuka dunia.

"Kami akan memberi kerjasama sepenuhnya kepada Ketua Audit Negara dan berharap hasil penemuannya dapat menjawab segala spekulasi yang ditimbulkan baru-baru ini," katanya dalam kenyataan di sini hari ini.



Khamis, 5 Mac 2015

8. Khidmat doktor pakar luar dikenakan GST

KUALA LUMPUR 4 Mac - Perkhidmatan perubatan pakar secara penyumberan luar oleh doktor kepada sesebuah hospital yang bukan majikannya akan dikenakan cukai barang dan perkhidmatan (GST) pada kadar standard enam peratus.

Ketua Pengarah Kastam, Datuk Seri Khazali Ahmad bagaimanapun berkata, perkhidmatan kesihatan yang diberikan kepada pengguna akhir dikecualikan daripada sistem percukaian itu.

Jelas beliau, invois yang dikeluarkan kepada pengguna tidak akan tertakluk kepada GST jika dikeluarkan oleh hospital yang berdaftar di bawah Akta Kemudahan dan Pusat Jagaan Kesihatan Swasta 1998 (Akta 586).

"Invois juga tidak tertakluk kepada GST jika dikeluarkan oleh doktor yang menjalankan penyumberan luar kepada hospital dan disediakan bilik pemeriksaan oleh pihak hospital.

"Ia juga termasuk doktor yang menjalankan penyumberan luar kepada hospital dan mempunyai klinik yang berdaftar di bawah Akta Kemudahan dan Pusat Jagaan Kesihatan Swasta 1998 (Akta 586) di dalam hospital," katanya dalam satu kenyataan di sini hari ini.

Menurut Khazali, sebanyak 347,165 buah syarikat telah berdaftar di bawah sistem GST sehingga semalam dan daripada jumlah itu, 1,907 adalah syarikat atau pemilikan tunggal yang menawarkan perkhidmatan perubatan pakar.

Beliau berkata, dengan perkembangan itu, pihaknya optimis GST akan dapat dilaksanakan dengan lancar apabila dikuat kuasa sepenuhnya mulai 1 April ini.

"Jabatan Kastam Diraja Malaysia (JKDM) meminta pihak yang membekalkan perkhidmatan yang dikecualikan di bawah Perintah Cukai Barang dan Perkhidmatan (Pembekalan Dikecualikan) 2014 tidak mengenakan GST kepada pengguna akhir perkhidmatan tersebut.

"Sekiranya terdapat mana-mana pihak melanggar sebarang perundangan GST, tindakan tegas akan diambil," katanya.



Jumaat, 6 Mac 2015

9. Sahkan akaun 1MDB bukti kerajaan telus

KUALA LUMPUR 5 Mac- Langkah Perdana Menteri, Datuk Seri Najib Tun Razak mengarahkan supaya Laporan Ketua Audit Negara terhadap akaun 1Malaysia Development Bhd. (1MDB) diserahkan kepada Jawatankuasa Kira-kira Wang Negara (PAC) untuk pemeriksaan adalah bukti amalan pentadbiran kerajaan yang telus dan bertanggungjawab.

Ahli Parlimen Kepala Batas, Datuk Seri Reezal Merican Naina Merican berkata, langkah tersebut memberi peluang kepada setiap ahli PAC yang terdiri daripada pemimpin Barisan Nasional (BN) dan pakatan pembangkang untuk melihat operasi 1MDB selepas banyak tuduhan liar dibuat ke atas badan pelaburan itu sebelum ini.

"Ini adalah bukti kerajaan sangat serius kerana langkah berkenaan menunjukkan kerajaan bertanggungjawab untuk menjawab isu-isu berhubung 1MDB dan menutup semua tuduhan liar daripada pembangkang.

"Di dalam PAC, ada pemimpin BN dan ada juga pembangkang, tidak ada apa-apa untuk disembunyikan jadi ini lebih telus kerana jika ada sesuatu yang luar biasa akan dibawa ke Dewan Rakyat," katanya.

Beliau yang juga ahli PAC berkata demikian dalam sidang akhbar selepas majlis Pelancaran Kerjasama Strategik Amanah Raya Berhad (ARB) dan Pos Malaysia Berhad (Pos Malaysia) berhubung pentadbiran harta pusaka di sini hari ini.

Yang turut hadir Pengurus Pos Malaysia, Tan Sri Mohd. Khamil Jamil; Pengarah Urusan Kumpulan ARB, Datuk Abdul Rahman Md. Khalid dan Pemangku Ketua Pegawai Eksekutif Kumpulan Pos Malaysia, Azlan Shahrim.

Reezal Merican berkata demikian sebagai mengulas arahan Perdana Menteri semalam yang meminta Ketua Audit Negara untuk mengesahkan secara bebas akaun 1MDB sebelum diserahkan kepada PAC untuk pemeriksaan telus dan bersifat bipartisan.

Arahan tersebut dikeluarkan Najib selepas memanggil juruaudit 1MDB, Deloitte menghadap Kabinet berikutan pelbagai laporan media berkaitan syarikat pembangunan strategik milik penuh kerajaan itu.



Ahad, 8 Mac 2015

10. Bersara 62 tahun dikaji

NIBONG TEBAL 8 Mac - Permohonan Kongres Kesatuan Pekerja-pekerja Di Dalam Perkhidmatan Awam (CUEPACS) untuk kerajaan mempertimbangkan cadangan melanjutkan umur persaraan kakitangan awam daripada 60 kepada 62 tahun akan dikaji.

Ketua Pengarah Perkhidmatan Awam, Tan Sri Mohamad Zabidi Zainal berkata, keputusan mengenai permohonan itu hanya akan ditentukan kerajaan yang perlu melihat keseluruhan proses dan prosedur sebelum cadangan tersebut dipersetujui.

"Saya enggan komen mengenai perkara ini buat masa ini kerana belum dapat maklumat lengkap.

"Tetapi kerajaan akan kaji permohonan yang dibuat sama ada sesuai atau tidak untuk dilaksanakan di negara ini," katanya.

Beliau ditemui pemberita selepas merasmikan Pusat Latihan Kemahiran Peringkat Tertinggi (Coas) Institut Kemahiran Tinggi Perda (Perda-Tech), di sini hari ini.

Yang turut hadir, Setiausaha Kerajaan Negeri, Datuk Seri Farizan Darus dan Pengurus Besar Lembaga Kemajuan Wilayah Pulau Pinang (Perda), Saringat Hassan.

Semalam, Presiden CUEPACS, Datuk Azih Muda meminta kerajaan mempertimbangkan cadangan itu dengan membandingkan negara seperti Singapura, Thailand, Sri Lanka, Eropah dan Amerika Syarikat (AS) yang menetapkan umur persaraan mencecah 65 tahun.

Jelasnya, lanjutan umur persaraan 62 tahun itu hanya diberikan kepada penjawat awam yang melepassi tapisan tertentu seperti tahap kesihatan dan kepakaran tertentu serta masih berminat untuk menyumbang kepakaran tenaga kerja.

Dalam pada itu Mohamad Zabidi berkata, kerajaan akan memperluas pengambilan calon berkelayakan Sijil Kemahiran Malaysia (SKM) ke dalam perkhidmatan awam berdasarkan bidang yang berkaitan.

Tambahnya, pada masa ini sebanyak 17 skim perkhidmatan sedia ada berkelayakan Sijil Pelajaran Malaysia (SPM) telah diperuntukkan kemasukan di peringkat SKM dan akan diperluaskan kepada lebih banyak skim perkhidmatan lain yang bersesuaian.

"Dasar kerajaan adalah menggalakkan lebih ramai orang muda untuk memasuki institut kemahiran dan keluar sebagai usahawan atau bekerja di sektor perkhidmatan dan perkilangan.

"Selain itu, dengan memiliki SKM skim gaji mereka dalam perkhidmatan awam berbeza daripada lulusan SPM biasa kerana ada nilai tambah kepada kelulusan mereka," ujarnya.



Isnin, 9 Mac 2015

11. 1MDB miliki aset, pelaburan kukuh

PERMATANG PAUH 8 Mac - 1Malaysia Development Berhad (1MDB) mempunyai aset yang mencukupi bagi membolehkannya muncul sebagai syarikat berdaya saing.

Timbalan Menteri Kewangan, Datuk Ahmad Maslan berkata, sehingga kini 1MDB mempunyai sebanyak 13 stesen janakuasa bebas (IPP) dengan empat daripadanya berada dalam negara manakala sembilan lagi di luar negara serta 'perjalanan pelaburan' yang sedang dilaksanakan berada pada landasan tepat.

Menurutnya, apa yang membenggu 1MDB ketika ini adalah syarikat itu telah dipolitikkan secara keterlaluan oleh pembangkang sehingga perkara baik dilihat sebagai buruk.

"1MDB juga mempunyai tanah yang strategik untuk tujuan pelaburan dan kini dalam perancangan membangunkan bandar baharu dikenali sebagai Bandar Malaysia selepas kita berjaya membina Putrajaya dan Kuala Lumpur," katanya.

Beliau berkata demikian dalam sidang akhbar selepas menghadiri majlis penerangan cukai barang dan perkhidmatan (GST) di Sekolah Menengah Kebangsaan Guar Perahu Indah di sini hari ini.

Menurut Ahmad, pembinaan bandar baharu telah dimulakan seperti Tun Razak Exchange di Kampung Pandan dan perkara itu membuktikan 1MDB beroperasi seiring dengan matlamat penubuhannya walaupun sering ditohmah pembangkang.

Berkenaan dengan pendaftaran GST pula, beliau berkata, sehingga semalam sebanyak 348,943 syarikat di seluruh negara telah mendaftar dan proses itu masih berlangsung.

Berdasarkan anggaran tambahnya, sehingga kini terdapat lebih 30,000 syarikat degil dan tidak mendaftar walaupun telah diminta berbuat demikian.

"Sehubungan itu, tindakan tegas akan diambil terhadap syarikat yang masih berdegil termasuk kompaun RM15,000 dan operasi berkenaan telah bermula sejak awal bulan ini," katanya.

Tambahnya, kerajaan memberi peluang sejak Jun tahun lepas untuk syarikat mendaftar GST iaitu tambahan dua bulan kerana memahami sistem itu merupakan sistem percukaian baharu yang memerlukan masa untuk difahami.



Isnin, 9 Mac 2015

12. Mesyuarat ASEAN-OECD perkasakan transformasi perkhidmatan awam

KUALA LUMPUR 8 Mac - Mesyuarat ASEAN-Organisasi bagi Kerjasama Ekonomi dan Pembangunan (OECD) yang memfokuskan kepada pelaksanaan amalan kawal selia baik (GRP) bakal memperkasakan transformasi perkhidmatan awam negara-negara ASEAN.

Ketua Setiausaha Negara, Tan Sri Dr. Ali Hamsa berkata, mesyuarat perdana dalam kalangan negara ASEAN itu bakal membincangkan kaedah terbaik bagaimana kerajaan mampu diuruskan secara efektif khususnya dalam aspek memperbaiki keputusan dan penetapan dasar atau polisi.

"GRP menjadi tema bagi integrasi ekonomi dan kesepakatan kawalan selia dalam usaha menyokong pelaksanaan rangka tindakan Komuniti Ekonomi ASEAN (AEC) dan Rancangan Utama Jaringan Hubungan ASEAN.

"GRP telah diiktiraf pada Pengisytiharan Nay Pyi Taw Komuniti ASEAN - 2015 oleh ketua-ketua menteri dan kerajaan negara-negara ASEAN," katanya dalam satu kenyataan di sini hari ini.

Malaysia dipilih sebagai tuan rumah kepada mesyuarat berkenaan yang berlangsung di ibu negara selama empat hari bermula esok.

Ali yang bakal mempengerusikan mesyuarat berkenaan memberitahu, pengisytiharan berkenaan menjadi rujukan terperinci dalam usaha mempromosikan prinsip pentadbiran baik, ketelusan dan kawalan dan penetapan peraturan lebih responsif.

Katanya, usaha itu akan dapat direalisasikan menerusi kerjasama antara pihak swasta, organisasi berasaskan komuniti dan pemegang amanah negara ASEAN.

"GRP dalam negara ASEAN akan melonjakkan penyampaian perkhidmatan awam dalam aspek penetapan peraturan sekali gus menjadi ikutan kepada institusi lain ke arah mencapai matlamat untuk memperoleh hasil yang lebih baik.

"GRP akan menjadi alat dalam memberi penekanan terhadap penetapan polisi berasaskan bukti yang secara tidak langsung bakal mengharmonikan urusan penetapan peraturan khususnya dalam kalangan negara ASEAN," katanya.

Selasa, 10 Mac 2015

13. 1MDB: SPRM tunggu laporan audit

SHAH ALAM 9 Mac - Suruhanjaya Pencegahan Rasuah Malaysia (SPRM) sedang menunggu laporan audit 1Malaysia Development Berhad (1MDB) selesai sebelum membuat sebarang keputusan untuk menyiasat syarikat itu berhubung dakwaan rasuah.

Ketua Pesuruhjayanya, Tan Sri Abu Kassim Mohamed berkata, pihaknya perlu menunggu laporan Ketua Audit Negara dan Jawatankuasa Kira-Kira Wang Negara (PAC) terlebih dahulu sebelum mengambil tindakan selanjutnya.

"Perdana Menteri, Datuk Seri Najib Tun Razak telah mengarahkan Ketua Audit Negara untuk memeriksa akaun 1MDB sebelum dibentangkan kepada PAC.

"Jika ada kes, mereka akan bawa kepada SPRM," katanya kepada pemberita selepas majlis menandatangani ikrar integriti korporat oleh Puspakom di sini hari ini.

Abu Kassim bagaimanapun enggan mengulas lebih lanjut berhubung isu tersebut dan meminta orang ramai membiarkan proses itu berjalan terlebih dahulu.

Selasa, 10 Mac 2015

14. Polis tubuh pasukan khas siasat semua laporan penyelewangan akaun 1MDB Peguam Negara, SPRM turut bekerjasama

KUALA LUMPUR 9 Mac - Polis Diraja Malaysia (PDRM) telah menubuhkan pasukan khas bagi menyiasat semua laporan yang dibuat berhubung isu penyelewangan dan salah laku terhadap akaun 1Malaysia Development Bhd. (1MDB).

Ketua Polis Negara, Tan Sri Khalid Abu Bakar berkata, pasukan khas tersebut yang ditubuhkan beberapa hari lalu turut mendapat kerjasama Suruhanjaya Pencegahan Rasuah Malaysia (SPRM) dan Peguam Negara bagi menyiasat sekiranya wujud unsur penyelewangan dan salah laku terhadap syarikat dana pelaburan strategik tersebut.

"Siasatan sudah pun bermula dan kita akan menyiasat semua laporan yang dibuat oleh mana-mana pihak. Setiap laporan dibuat kita akan buka kertas siasatan dan jika benar ada kesalahan, siasatan diteruskan.

"Seperti mana yang dilaporkan oleh pengadu kepada kita, orang yang disyaki terlibat dengan penyelewengan IMDB ini kita akan siasat," katanya.

Beliau berkata demikian dalam sidang akhbar selepas Majlis Graduasi Pertama Latihan Asas Kepolisan (PLAK), PDRM / Universiti Derby 2015 di Maktab PDRM, Cheras di sini hari ini.

Menurut Khalid, sesiapa sahaja individu yang disyaki dan dinyatakan dalam laporan yang dibuat akan panggil untuk membantu siasatan mengikut Seksyen 409 dan Seksyen 420 Kanun Keseksaan.

Sementara itu, mengulas perkembangan siasatan perhimpunan haram Sabtu lalu, Khalid berkata, pihaknya telah pun menahan dua individu setakat ini dan meminta sesiapa sahaja yang terlibat tampil menyerah diri untuk membantu siasatan.

"Semasa perhimpunan, pelbagai isu yang dibangkitkan, jadi kita perlu menyiasat semua isu yang dibangkitkan. Kepada mereka yang terlibat, eloklah serah diri untuk disiasat sebelum polis menahan mereka.

"Apa yang polis buat berdasarkan prosedur undang-undang, jadi kita minta tidak perlulah buat spekulasi tentang tindakan kita termasuklah isu reman kerana jika majistret luluskan reman, bermakna beliau menerima alasan-alasan kita dalam siasatan.

"Tidak semua reman kita dapat," katanya.

Sementara itu, PDRM sedang bekerjasama dengan Suruhanjaya Komunikasi dan Multimedia Malaysia (SKMM) untuk mengesan mereka yang terlibat dalam kes ugutan mahu meletupkan kereta dan membunuh Khalid baru-baru ini.

Setakat ini polis masih menjalankan siasatan untuk mengesan individu yang bertanggungjawab memuat naik video ugutan bunuh bertarikh 23 Januari bertajuk "Peringatan kepada IGP" itu.

Video berdurasi 1.27 minit dimuat naik di YouTube, memaparkan tiga individu berpakaian hitam dengan muka seorang daripada mereka ditutupi logo kumpulan sementara dua lagi memakai topeng muka dan memberikan amaran dalam bahasa Melayu sambil memegang sekeping kertas memaparkan wajah individu yang tidak dapat dikenal pasti.

Di akhir video, kelihatan seorang lagi lelaki bertopeng bangkit membawa kereta mainan di hadapan lelaki dengan muka bertutup dan membakar kereta tersebut dengan pemetik api disusuli bunyi letupan.



Selasa, 10 Mac 2015

15. Proses audit 1MDB dimulakan

PUTRAJAYA 10 Mac - Jabatan Audit Negara telah memulakan proses pengauditan terhadap syarikat dana pelaburan strategik milik kerajaan, 1Malaysia Development Berhad (IMDB) sebaik sahaja menerima arahan Perdana Menteri, Datuk Seri Najib Tun Razak minggu lalu.

Ketua Audit Negara, Tan Sri Ambrin Buang sehubungan itu berkata, pihaknya akan mengumpulkan segala maklumat yang diperlukan termasuk memanggil beberapa pihak berkaitan termasuk bagi membantu melengkapkan laporan audit tersebut.

Walau bagaimanapun beliau berkata, langkah memanggil individu-individu terbabit termasuk Perdana Menteri sendiri bagi tujuan itu tertakluk kepada keperluan. - UTUSAN ONLINE



Jumaat, 13 Mac 2015

16. 1MDB dijangka lancer IPO Dapat tangani aliran tunai syarikat pelaburan strategik kerajaan itu - Ahmad Husni

KUALA LUMPUR 12 Mac - 1Malaysia Development Bhd. (1MDB) dijangka melancarkan tawaran awam permulaan (IPO) pada Jun atau Julai ini bagi mendapatkan dana yang akan digunakan menangani masalah aliran tunai syarikat pelaburan strategik kerajaan itu.

Menteri Kewangan II, Datuk Seri Ahmad Husni Hanadzlah berkata, sumber kewangan jangka pendek itu akan digunakan untuk penstrukturran semula pinjaman 1MDB dan memastikan operasi syarikat berjalan lancar.

"IPO sangat penting, jadi dalam jangka pendek diperlukan untuk penstrukturran semula pinjaman yang ada dan setelah selesai IPO itu, insya-Allah seperti saya nyatakan ia akan menjadi lebih lancar untuk 1MDB.

"Mengenai masa depannya, saya menyatakan tadi batu penghalang ialah kedudukan kewangan. Selepas IPO selesai, sebahagian permasalahan selesai," katanya ketika menjawab soalan **Mohd. Fasiah Mohd. Fakeh (BN-Sabak Bernam)** dalam sidang Dewan Rakyat hari ini.

Mohd. Fasiah meminta kerajaan menyatakan prestasi 1MDB sebagai syarikat pelaburan kerajaan dalam meningkatkan lagi pelaburan strategik untuk negara termasuk juga rakan kongsi luar negara serta prospek dan potensi dalam ekonomi global yang mencabar.

Reuters sebelum ini dalam laporannya berkata, 1MDB menangguhkan IPO tersebut yang bernilai lebih AS\$3 bilion (RM9.59 bilion) akibat proses usaha wajar (due diligence) dan rundingan bagi langkah penstrukturkan semula hutang berjumlah AS\$1.7 bilion (RM5.5 bilion) yang lebih lama daripada dijangkakan.

Menurut laporan itu yang memetik sumber, IPO berkenaan sepatutnya dilancarkan pada suku keempat 2014 tetapi isu terbaru itu menyebabkan IPO 1MDB ditangguh sehingga tahun ini.

Sementara itu, menjawab soalan tambahan daripada **Mohd. Rafizi Ramli (PKR-Pandan)**, Ahmad Husni menjelaskan, Kabinet pada 25 Februari lalu bersetuju meluluskan suntikan dana sebanyak RM950 juta kepada 1MDB sebagai stand by credit dan setakat ini, sebanyak RM60 juta telah digunakan.

Dalam pada itu, mengambil contoh kejayaan kerajaan membina Pelabuhan Klang, beliau meminta semua pihak supaya tidak terlalu mudah membuat kesimpulan mengenai 1MDB sebaliknya memberi peluang kepada syarikat berkenaan untuk berkembang terlebih dahulu.

"Kita tengok pada masa depan nanti kita tahu lah sama ada 1MDB akan hancur atau bangun, kita tengok macam Pelabuhan Klang, dulu bising di sini (Dewan Rakyat), kita punya menghina Pelabuhan Klang tetapi sekarang semua baik."

"Saya tidak kata sangat bagus, sangat lancar, 1MDB berdepan masalah aliran tunai jadi apabila IPO, itu penyelesaian jangka panjang," katanya.



Sabtu, 14 Mac 2015

17. 1MDB: PetroSaudi tolak kritikan

KUALA LUMPUR 13 Mac - Syarikat perkhidmatan dan penerokaan minyak berpangkalan di Arab Saudi, PetroSaudi International (PSI) hari ini menolak kritikan dalam talian yang tidak tepat mengenai syarikat pembangunan strategik Malaysia yang pernah menjalin usaha sama dengannya, 1Malaysia Development Bhd. (1MDB).

"Sebarang kenyataan mengenai salah laku dalam dakwaan dalam talian mengenai perkongsian adalah palsu semata-mata. Semua modal yang dilaburkan oleh 1MDB telah dikembalikan-dengan keuntungan," kata seorang jurucakap PetroSaudi yang tidak dinamakan telah dipetik sebagai berkata dalam satu kenyataan yang dikeluarkan di sini hari ini.

Malah, katanya, usaha sama itu, yang berakhir pada 2012, mendapat manfaat bersama bagi Malaysia dan PetroSaudi, dan maklumat berhubung usaha sama itu boleh didapati secara umum di dalam akaun 1MDB yang diaudit di Suruhanjaya Syarikat Malaysia.

"Serangan tidak adil atau palsu mengenai pelabur dan rakan kongsi dari Malaysia hanya untuk merosakkan negara," kata kenyataan itu.

Ia berkata, PetroSaudi komited untuk menyampaikan projek yang berjaya dalam sektor petroleum di peringkat global, bekerjasama dengan rakan-rakan kongsi ke tahap standard antarabangsa tadbir urus korporat dan usaha yang wajar.

"Kami tidak akan terhalang dengan cerita-cerita yang tidak tepat atau berniat jahat yang disebar dalam talian.

"Beberapa laporan ini dilihat berdasarkan petikan berpilih dan dokumen serta emel dalaman syarikat yang diputarbelitkan, salinan asalnya yang kami percaya telah didapati secara tidak sah dan dalam beberapa kes telah diubah.

"Kami kini mempertimbang dari segi undang-undang," katanya.

PSI, syarikat perkhidmatan dan penerokaan minyak global yang beroperasi di Latin Amerika, Asia dan Afrika, beribu pejabat di Al-Khobar, Arab Saudi dengan pejabat-pejabat di London, Geneva, Houston, Jakarta, Carupano dan Caracas. - BERNAMA



Isnin, 16 Mac 2015

18. Beri kepercayaan kepada Ketua Audit Negara

TELOK KEMANG 15 Mac - Kepercayaan penuh harus diberi kepada Ketua Audit Negara untuk memeriksa akaun syarikat pembangunan strategik milik penuh kerajaan, 1Malaysia Development Bhd (1MDB) seperti yang diarahkan oleh kerajaan baru-baru ini.

Sementara menunggu hasil pemeriksaan itu, semua orang perlu memberi tumpuan kepada kerja dan kehidupan masing-masing dan tidak harus dilalaikan dengan pelbagai perkara yang disebarluaskan mengenai 1MDB terutama di dunia siber.

Menteri Besar Negeri Sembilan, Datuk Seri Mohamad Hasan berkata, beliau kesal kerana terlalu banyak cerita mengenai 1MDB yang disebarluaskan melalui internet dengan masing-masing mahu 'menunjuk handal' seolah-olah mereka pakar dalam isu tersebut.

Padahal, kata beliau, Kabinet sudah mengarahkan Ketua Audit Negara memeriksa akaun 1MDB dan pihak berkenaan perlu diberikan kepercayaan untuk berbuat demikian dengan tempoh masa yang tidak terhad sebelum menyerahkan penemuan tersebut kepada Jawatankuasa Kira-kira Awam (PAC).

"Biarlah Ketua Audit Negara buat kerja, enam bulan ke setahun ke, selepas itu diserah kepada PAC, biarlah mereka teliti. Jadi, kita perlu berhenti tohmah atau fitnah 1MDB, cukuplah, banyak kerja lain yang perlu kita buat.

"Hari ini Perdana Menteri cakap dalam Mingguan Malaysia bahawa beliau tidak akan melindungi siapa-siapa. Apa lagi yang kita hendak pening-peningkan kepala. Hidup perlu diteruskan, sambung hidup, jangan duduk kopi siang malam cakap pasal 1MDB," katanya dalam sidang akhbar selepas merasmikan Pusat Internet 1 Malaysia (PI1M) Linggi, di sini hari ini.

Yang turut hadir Ahli Dewan Undangan Negeri Linggi, Abdul Rahman Mohd Redza dan Ketua Pegawai Pembangunan Industri SKMM, Datuk Mohd Ali Hanafiah Mohd Yunus.

Mohamad berkata demikian ketika diminta mengulas ucapan beliau pada majlis itu yang meminta orang ramai berhati-hati dengan bahan yang disebarluaskan melalui alam maya termasuk dalam isu berkaitan 1MDB.

Katanya, internet tidak boleh dianggap seolah-olah seperti kitab suci yang mana semuanya adalah benar belaka.



Isnin, 16 Mac 2015

19. Tujuh lagi UTC dibina pada 2015 Babitkan beberapa negeri dengan kos RM200 juta

JOHOR BAHRU 15 Mac - Kerajaan bakal membina sebanyak tujuh buah Pusat Transformasi Bandar (UTC) pada tahun ini di beberapa lokasi seluruh negara dengan melibatkan kos RM200 juta.

Timbalan Menteri Kewangan, Datuk Ahmad Maslan berkata, UTC baharu itu akan dibina di Negeri Sembilan, Kelantan, Terengganu, Perlis, manakala tiga UTC mini di Kedah, Sabah dan Sarawak.

Menurutnya, usaha itu adalah suatu langkah proaktif kerajaan dalam memastikan pelbagai agensi kerajaan, swasta dan syarikat milik kerajaan (GLC) menyediakan perkhidmatan mereka di bawah satu bumbung bagi kemudahan masyarakat.

"Hingga kini, 9.6 juta rakyat telah mendapatkan perkhidmatan di pelbagai agensi bernaung di bawah UTC seluruh negara sejak mula diperkenalkan.

"Sehubungan itu, tahun ini kerajaan bakal menambah sebanyak tujuh UTC termasuk tiga UTC mini bagi menampung keperluan operasi di beberapa lokasi yang telah dikenal pasti," katanya dalam sidang akhbar selepas melakukan lawatan kerja ke UTC Johor di pusat beli-belah Galleria@Kotaraya, di sini hari ini.

Pada masa ini, terdapat 10 buah UTC termasuk dua UTC mini beroperasi di seluruh negara iaitu di Kuala Lumpur, Melaka, Perak, Pahang, Kedah, Sabah dan Sarawak.

Ahmad mengakui masih terdapat beberapa penambahbaikan yang perlu dilakukan bagi memberi perkhidmatan terbaik khususnya melibatkan dua jabatan kerajaan iaitu Jabatan Imigresen dan Jabatan Pendaftaran.

"Kita sedar wujudnya rungutan terhadap dua jabatan ini dan pihak berwajib akan berusaha untuk mencari jalan penyelesaian terbaik khususnya membabitkan aspek masa menunggu untuk berurusan di kaunter.

"Dalam pada masa sama, kita juga berharap agensi terlibat dapat mengambil kira kebijakan kakitangan yang bertugas di semua UTC untuk kebaikan kedua-dua pihak, petugas dan pengunjung," katanya.



Selasa, 17 Mac 2015

20. Pelan sektor perkhidmatan

KUALA LUMPUR 16 Mac - Pelan Strategik Sektor Perkhidmatan serta Pelan Induk Logistik dan Fasiliti Perdagangan dilancarkan hari ini dalam usaha kerajaan melonjakkan sumbangan sektor itu sehingga 58 peratus kepada pertumbuhan ekonomi negara pada tahun 2020.

Bagi Pelan Strategik Sektor Perkhidmatan, kerajaan menggariskan empat dasar utama iaitu pengantarabangsaan firma perkhidmatan, pengurusan incentif pelaburan berkesan, peningkatan pembangunan modal insan dan pembaharuan tadbir urus sektoral bersepudu.

Perdana Menteri, Datuk Seri Najib Tun Razak berkata, lima pelan strategik dan 21 pelan tindakan pula dirangka untuk meningkatkan kecekapan ekonomi serta merangsang eksport negara menerusi Pelan Induk Logistik dan Fasiliti Perdagangan.

Serentak dengan pelancaran pelan strategik dan pelan induk itu, beliau yang juga Menteri Kewangan seterusnya mengumumkan penubuhan sebuah Jawatankuasa Khas Sektor Perkhidmatan yang dianggotai 12 menteri Kabinet dan ketua-ketua agensi berkaitan.

"Sektor perkhidmatan merupakan peneraju utama ekonomi dan penjana penting pekerjaan di Malaysia. Sektor ini menyumbang 55 peratus kepada Keluaran Dalam Negara Kasar (KDNK) dan menyediakan lapan juta pekerjaan tahun lalu tetapi perlu terus diperkasakan.

"Kita perlu mengorak langkah strategik dengan beralih ke arah perkhidmatan berintensifkan pengetahuan, produktiviti tinggi, boleh didagangkan dan menjana pekerjaan bergaji tinggi," katanya ketika berucap dalam majlis pelancaran itu di Dewan Banquet, Parlimen hari ini.

Dalam pada itu, Najib berkata, menerusi Pelan Induk Industri Logistik, kerajaan menjangkakan pelan tersebut menjana 146,000 pekerjaan baharu yang kebanyakannya berkemahiran tinggi menjelang tahun 2020.

Tambah beliau, bagi mempercepatkan pelan induk tersebut sebagai langkah awal, RM300 juta telah diperuntukkan untuk tujuan menambah baik laluan ke Pelabuhan Klang dan sebanyak RM12 juta untuk menaik taraf terminal kereta api Padang Besar.



Rabu, 18 Mac 2015

21. Pelabelan harga ubat perlu kelulusan MyCC

KUALA LUMPUR 17 Mac - Kementerian Kesihatan sedang berusaha mendapatkan kelulusan daripada Suruhanjaya Persaingan Malaysia (MyCC) berhubung kebenaran pelabelan harga runcit pada kotak ubat.

Menterinya, Datuk Seri Dr. S. Subramaniam berkata, inisiatif itu merupakan sebahagian usaha kementerian untuk memastikan rakyat mendapatkan bekalan ubat pada harga berpatutan.

"Secara umumnya cadangan kita adalah untuk melakukan pelabelan harga runcit cadangan pada kotak ubat generik.

"Sehingga kini kita masih tidak dapat kelulusan khususnya daripada MyCC yang memberikan pandangan bahawa inisiatif itu dianggap sebagai antipesaingan," katanya ketika menjawab soalan **Datuk Seri Abdul Ghapor Salleh (BN-Kalabakan)** berhubung kaedah yang diguna pakai oleh kementerian dalam mengawal harga ubat di Dewan Rakyat, hari ini.

Menurut Subramaniam, secara dasar harga ubat di negara ini tidak dikawal melalui peruntukan undang-undang.

Katanya, bagaimanapun, kementerian telah menyediakan senarai harga runcit yang disarankan bagi ubat tertentu sebagai panduan dan rujukan rakyat untuk mendapatkan bekalan ubat daripada hospital, klinik termasuk farmasi swasta.

"Senarai harga itu telah dimuat naik di laman web Jabatan Farmasi sebagai usaha berterusan kementerian memantau harga ubat yang dijual di negara ini.

"Usaha tersebut dilakukan melalui kerjasama industri serta pengedar ubat yang secara sukarela untuk memberikan harga runcit bagi memastikan harga ubat yang dijual tidak melebihi harga yang dicadangkan," katanya.



Isnin, 23 Mac 2015

22. Dasar Perhutanan Negara dikaji semula

ALOR SETAR 22 Mac -Kementerian Sumber Asli dan Alam Sekitar sedang mengkaji semula Dasar Perhutanan Negara bagi melindungi sumber hutan negara daripada terus diceroboh.

Timbalan Menterinya, Datuk Seri Dr. James Dawos Mamit berkata, kajian semula itu penting dan tepat pada masanya agar satu dasar yang lebih menyeluruh serta mengambil kira keperluan semasa dalam dan luar negara dapat digubal.

"Tumpuan masyarakat terhadap hutan dan fungsi hutan telah berubah secara ketara dan kini hutan tidak lagi dianggap sebagai sumber kayu balak untuk pembangunan sosioekonomi semata-mata.

"Kerajaan sentiasa memandang serius terhadap isu-isu pencemaran alam sekitar dan pembukaan tanah secara haram dan pemantauan berkesan dilaksanakan dengan pelbagai usaha untuk mengatasi isu tersebut," katanya kepada pemberita selepas menghadiri majlis sambutan Hari Hutan Antarabangsa Peringkat Kebangsaan 2015 di Taman Jubli Emas, Suka Menanti di sini hari ini.

Menurut James, usaha pemuliharaan hutan amat penting bagi memastikan fungsi hutan kepada masyarakat terus relevan dan dipelihara.

Sabtu, 28 Mac 2015

23.10 Peratus bermasalah integrity

Daripada 140,000 warga PDRM termasuk penjawat awam

KUALA LUMPUR 28 Mac - Kira-kira 10 peratus daripada 140,000 warga Polis Diraja Malaysia (PDRM) termasuk penjawat awam yang berkhidmat dengan pasukan itu dikatakan mempunyai masalah integriti.

Pengarah Jabatan Integriti dan Pematuhan Standard (JIPS), Datuk Zubaidah Md. Ismail berkata, pihaknya ketika ini memberi tumpuan terhadap golongan tersebut bagi memastikan mereka dapat meningkatkan integriti serta mematuhi segala peraturan yang ditetapkan.

"Selain memberi tumpuan kepada golongan yang kecil ini kita turut memantau barisan hadapan yang memberi khidmat secara terus kepada orang ramai," katanya dalam sidang akhbar selepas menghadiri Program Walkathon bersama PDRM dengan tema 'Rasuah Memusnahkan' di Taman Tasik Titiwangsa di sini hari ini.

Yang hadir bersama Menteri di Jabatan Perdana Menteri Senator Datuk Paul Seng Kuan dan Timbalan Ketua Polis Negara, Datuk Seri Noor Rashid Ibrahim serta pengarah-pengarah jabatan PDRM yang lain.

Zubaidah memberitahu, usaha bagi memulihkan masalah warga PDRM yang tidak berintegriti akan mengambil jangka masa yang lama.

Sementara itu, Noor Rashid ketika berucap berkata, walaupun hanya segelintir yang terlibat dalam gejala tidak bermoral tersebut namun masyarakat akan melihat perkara tersebut secara menyeluruh kepada semua anggota organisasi.

"Hal ini sangat bersesuaian dengan peribahasa 'kerana nila setitik, rosak susu sebelanga'," katanya.

Isnin, 30 Mac 2015

24. Semak cukai eksport MSM

KUALA LUMPUR 29 Mac - Kerajaan perlu menyemak semula keperluan mengenakan cukai eksport minyak sawit mentah (MSM) sejak ditangguhkan Oktober lalu, memandangkan harga MSM sekarang berada di bawah paras RM2,250 satu tan metrik.

Timbalan Pengurus Persatuan Minyak Sawit Malaysia (MPOA), Abdul Halim Ahmad berkata, keadaan itu secara tidak langsung akan memberi gambaran negatif terhadap pasaran sawit di negara ini dan berkemungkinan menyebabkan pembeli beralih ke pasaran Indonesia yang mengenakan cukai eksport sifar sejak tahun lepas.

Katanya, sekarang bukanlah waktu yang sesuai untuk mengenakan cukai eksport tersebut memandangkan harga MSM berlegar sekitar RM2,191 (sehingga 26 Mac 2015) dan industri sawit pula baru pulih selepas terjejas akibat tragedi banjir besar pada hujung 2014.

"Dalam keadaan harga yang lemah sepatutnya kerajaan perlu menilai balik beberapa perkara termasuk keperluan mengenakan semula cukai eksport ini.

"Ini kerana dalam keadaan sekarang, industri sawit sebenarnya memerlukan bantuan daripada kerajaan dalam apa bentuk sekalipun," katanya ketika ditemui di sini baru-baru ini.

Mulai April ini, cukai eksport MSM akan dinaikkan kepada 4.5 peratus setelah kerajaan mengecualikan cukai tersebut pada Oktober 2014 hingga Disember 2014 dan kemudian melanjutkan tempoh itu sehingga akhir Februari 2015 untuk melonjakkan eksport MSM dan mengurangkan inventori.

Jabatan Kastam Diraja Malaysia (JKDM) menerusi satu pekeliling yang disiarkan di laman web Lembaga Minyak Sawit Malaysia (MPOB) berkata, paras harga yang diunjurkan pada April adalah antara RM2,250 dan RM2,400 setan metrik.

Menurut MPOB, pihak JKDM akan menaikkan lagi cukai berkenaan jika harga rujukan bagi eksport itu melebihi RM2,250 setan metrik. Buat masa ini, harga rujukan itu adalah RM2,288.41 setan metrik.

Regim perculaian duti eksport MSM baharu yang diperkenalkan pada Januari 2013, tidak berubah sejak 1970.

Abdul Halim yang juga Naib Presiden Eksekutif dan Ketua Kluster Perladangan Felda Global Ventures Holdings Bhd. (FGV) berkata, industri sawit negara belum ditakrifkan sebagai 'tenat' kerana pengeluaran masih berjalan dengan aktif walaupun harga MSM menunjukkan trend penurunan dan berada di bawah RM2,200.

Ditanya kemungkinan harga MSM boleh mencecah di bawah paras RM2,000, katanya, keadaan itu pernah berlaku suatu ketika dulu.

"Cuma dalam keadaan sekarang, kita berharap ia tidak berlaku. Tetapi jika dilihat pada faktor-faktor lain terutama harga minyak mentah dunia yang menurun 50 peratus daripada AS\$100 (RM367.94) setong, tidak mustahil perkara ini juga boleh berlaku ke atas industri sawit jika tiada sebarang inisiatif dilaksanakan bagi mengatasi keadaan ini," jelasnya.